



UNIVERSITÄTS-
BIBLIOTHEK
PADERBORN

Universitätsbibliothek Paderborn

The Works Of The Right Honourable Joseph Addison, Esq.

In Four Volumes

Addison, Joseph

London, 1721

Pax Guilielmi auspiciis Europæ reddita, 1697.

[urn:nbn:de:hbz:466:1-53615](https://nbn-resolving.org/urn:nbn:de:hbz:466:1-53615)

Pax G U L I E L M I Auspiciis Europæ
reddita, 1697.

Postquam ingens clamorque virum, strepitusque tubarum,
Atque omnis belli cecidit fragor; aspice, Cæsar,
Quæ tibi solliciti, turba importuna, Poetæ
Munera deducunt: generosæ a pectore flammæ,
Diræque armorum effigies, simulachraque belli
Tristia diffugiant: O tandem absiste triumphis
Expletus, penitusque animo totum excute Martem.

Non ultra ante oculos numerofo milite campi
Miscentur, solito nec fervent arva tumultu;
Stat circum alta quies, curvoque innixus aratro
Desertas fossas, et castra minantia castris
Rusticus invertit, tacita formidine lustrans
Horroremque loci, et funestos stragibus agros.
Jamque super vallum et munimina longa virescit
Expectata seges, jam propugnacula rident
Vere novo; infuetos mirabitur incola culmos,
Luxuriamque soli, et turgentem a sanguine messem.

Aspicias ut toto excitus venit advena mundo
Bellorum invisens sedem, et confusa ruinis
Oppida, et everfos flammaram turbine muros!

Ut

Ut trepidos rerum Annales, tristemque laborum
 Inquirat feriem, attonitis ut spectat ocellis
 Semiratas turres, et adhuc polluta cruore
 Flumina, famososque ORMONDI volnere campos!

Hic, ubi saxa jacent disperso infecta cerebro,
 Atque interruptis hiscunt divortia muris,
 Vexillum intrepidus * fixit, cui tempora dudum
 Budenses palmæ, peregrinaque laurus obumbrat.
 Ille ruens aciem in mediam, qua ferrea grando
 Sparsa furit circum, et plumbi densissimus imber,
 Sulphuream noctem, tetrasque bitumine nubes
 Ingreditur, crebroque rubentem fulgure fumum.
 Ut vario anfractu, et disiectis undique saxis
 Mænia discedunt, scopulisque immane minantur
 Desuper horrificis, et formidabile pendent!

Hic pestem occultam, et fœcundas sulphure moles
 Cernere erat, magno quas inter mota tumultu
 Prælia fervebant; subito cum claustra fragore
 Horrendum disrupta tonant, semiustaque membra,
 Fumantesque artus, laniataque corpora lethum
 Corripit informe, et rotat ater in æthere turbo.

Sic, postquam Enceladi dejecit fulmine fratres
 Cœlicolum pater, et vetuit contemnere divos:
 Divulsam terræ faciem, ingentesque ruinas
 Mortales stupuere; altum hinc mirantur abesse
 Pelion, invertique imis radicibus Ossam;
 Hic fluvium moles inter confusaque saxa

* Honoratissimus D. Dominus CUTTS. Baro de Gowran, &c.

Reptare, atque aliis discentem currere ripis.
Stant dubii, et notos montes umbrasque requirunt,
Errore ambiguo elusi, et novitate locorum.

Nempe hic AURIA CI nuper vexilla secuta
Confluxere acies, hic, aspera corda, Britanni,
Germanusque ferox, et juncto fœdere Belga;
Quique truci Boreæ, et cœlo damnatus iniquo
Vitam agit in tenebris; et qui dudum ore perusto
Decolor admoti prodit vestigia Phœbi:
Undique conveniunt, totum conscripta per orbem
Agmina, NASSOVIQUE latus socialibus armis
Circumfusa tegunt, fremitusque et murmura miscent,
Tam vario disjuncta situ, tot dissona linguis.

Te tamen e mediis, * Ductor Fortissime, turmis
Exere, Tu vitam (si quid mea carmina possunt)
Accipies, populique encomia sera futuri,
Quem varias edoctum artes, studiisque Minervæ
Omnibus ornatum Marti Rhedycina furenti
Credidit invita, et tanto se jactat alumno.
Hunc nempe ardorem, atque immensos pectoris æstus
Non jubar Arctoum, aut nostri penuria cœli,
Sed plaga torridior, qua sol intentius omnes
Effundit radios, totique obnoxia Phœbo
India progenuit, tenerisque incoxit ab annis
Virtutem immodicam, et generosæ incendia mentis.

Jam quoque torpentem qui infelix suspicit Arcton,
Brumamque æternam frigusque perambulat, ursæ

* Infig. Dom. Christoph. Codrington, unus ex Regii Satellitii Præfectis.

Horridus exuviis, GULIELMI ingentia facta
 Describit fociis, pugnataque in ordine bella
 Attentus numerat, neque brumam aut frigora curat,
 En! vastos nivium tractus et pallida regna
 Deserit, imperio extremum * qui subjicit orbem,
 Indigenasque hyemes, Britonumque Heroa pererrat
 Luminibus tacitis; subeunt nunc fusa Namurcæ
 Mænia, nunc tardo quæ sanguine plurima fluxit
 Boinia, nunc dubii palma indiscreta Senessi.
 Quæ facies, et quanta viri! quo vertice in auras
 Assurgit! quali firmat vestigia gressu,
 Majestate rudi, et torvo spectabilis ore!

Sic olim Alcides, immania membra Leonis
 Instratus spoliis, vasta se mole ferebat,
 Evandri amplexus dextramque adjungere dextræ
 Cum peteret, tectisque ingens succederet hospes.

Dum pugnas, GULIELME, tuas, camposque cruentos
 Accipit, in venis ebullit vividus humor,
 Corda micant crebro, et mentem ferit æmulus ardor.
 Non jam Riphæos hostis populabitur agros
 Impune, aut agitabit inultas Sarmata prædas.

Quis tamen ille procul fremitus! Quæ murmura vulgi
 NASSOVIVM ingeminant! video cava littora circum
 Fervere remigibus, subitisque albescere velis.
 Anglia solve metus, et inanes mitte querelas,
 NASSOVI securo tui, desiste tumentes
 Prospicere in fluctus animo suspensa, trucesque
 Objurgare notos, tardamque requirere puppim:

* Muscoviæ Imperator.

Optatus tibi Cæsar adest, nec ut ante videbis
Sollicitum belli studiis, fatalia Gallo
Consilia et tacitas versantem in pectore pugnas.
Olli grata quies et pax tranquilla verendum
Composuit vultum, lætosque afflavit honores.

Ut denso circum se plurimus agmine miles
Agglomerat lateri! ut patriam veteresque penates
Respicit exultans! juvat ostentare recentes
Ore cicatrices, et vulnere cruda, notasque
Mucronum insignes, afflataque sulphure membra.
Chara stupet conjux, reducisque incerta mariti
Vestigat faciem; trepida formidine proles
Stat procul, et patrios horrescit nescia vultus.
Ille graves casus, duri et discrimina belli
Enumerat, tumidisque instaurat prælia verbis.
Sic, postquam in patriam fœcunda heroibus Argo
Phryxeam attulerat pellem, lanamque rigentem
Expofuit Graiis, et tortile velleris aurum,
Navita terrificis infamia littora monstris
Describit, mixto spirantem incendia fumo
Serpentem, vigilesque feras, plaustroque gementes
Infolito tauros, et anhelos igne juvencos.

Te tamen, O quantis GULIELME erepte periclis,
Accipimus reducem: tibi Diva Britannia fundit
Plebemque et Proceres: medias quacunque per urbes
Ingredieris, crebræ confurgunt undique pompæ,
Gaudiaque et plausus: mixto ordine vulgus euntem
Circumstat fremitu denso: Tibi Jupiter annum
Serius invertit, luces mirata serenas
Ridet Hyems, festoque vacat cœlum omne triumpho.

Jamque * Nepos tibi parvus adest, lætoque juventæ
Incessu, et blando testatur gaudia risu.

Ut Patrius vigor atque elati gratia vultus

Cæsareum spirant, majestatemque verendam

Infundunt puero! ut Mater formosa serenat

Augustam frontem, et sublimia temperat ora!

Agnosco faciem ambiguum, mixtosque parentes.

Ille tuas, GULIELME, acies, et tristia bella,

Pugnasque innocua dudum sub imagine ludit.

Nunc indignanti similis fugitiva pusillæ

Terga premit turmæ, et falsis terroribus implet,

Sternitque exiguum ficto cognomine Gallum.

Nunc simulat turres, et propugnacula parva

Nominibus signat variis; subitoque tumultu

Sedulus infirmas arces, humilemque Namurcam

Diruit; interea generosæ in pectore flammæ

Affurgunt sensim juveni, notat ignis honestas

Purpureo fervore genas, et amabilis horror.

Quis tamen Augustæ immensas in carmine pompas

Instruet, in luteos ubi vulgo effusa canales

Vina rubent, variatque infectas purpura sordes?

Quis lapsus referet stellarum, et fictile cælum,

Qua laceram ostendunt redolentia compita chartam,

Sulphuris exuvias, tubulosque bitumine cassos?

En procul attonitam video clarescere noctem

Fulgore insolito! ruit undique lucidus imber,

Flagrantesque hyemes; crepitantia sidera passim

Scintillant, totoque pluunt incendia cælo.

* Celsissimus Princeps Dux Glocestrensis.

Nec minus in terris Vulcanus mille figuras
 Induit, ignivomasque feras, et fulgida monstra,
 Terribiles visu formas! hic membra Leonis
 Hispida mentitur, tortisque comantia flammis
 Colla quatit, rutilasque jubas; hic lubricus Anguem
 Ludit, subsiliens, et multo sibilat igne.

Lætitiâ ingentem atque effusa hæc gaudia civis
 Jam tandem securus agit, positoque timore
 Exercet ventos, classemque per ultima mundi
 Impune educit, pelagoque licentius errat:
 Seu constricta gelu, mediisque horrentia Cancri
 Mensibus arva videt; seu turgida malit olenti
 Tendere vela noto, qua thurea flamina miscet
 Æolus, et placidis perfundit odoribus auras.

Vos animæ illustres heroum, umbræque recentes,
 Quarum trunca jacent et adhuc stillantia crudis
 Corpora vulneribus, quibus hæc optabilis orbi
 Parta quies, nondum NASSOVO abducite vestro
 Fida satellitia, at solitis stipate catervis
 Ductorem, et tenues circum diffundite turmas.
 Tuque MARIA, tuos non unquam oblita Britannos,
 O Diva, O patiens magnum expectare maritum,
 Ne terris Dominum invidias, quanquam amplius illum
 Detineant, longamque agitent sub vindicæ pacem.

